

DIT UN DAT

De Lasso-Trick

Up dat Oller word dat faken stuur sük to bucken. Huft- un Kneegelenken worden stiev of brotterg. Denn musst du di mening Trick utdenken, dat du mörgens de Kleer ankriggst.

Dat fangt al bi de Unnerbüx an. Du settst di an Beddskant un hollst een Been liek van di.

Dat Been sall as Eerste dör de Büxpiep van de Unnerbüx. Sowied na vöörn, dat du de Büx over de Foot striepen kannst, geiht neet.

Denn is de Lasso-Trick antoraden. Wenn du dat linke Been van di weghollst, faatst du de Unnerbüx an de rechte Bund un slingerst de Büx in Richt up de linke Foot so, dat de Foot dör dat Büxengatt fluppt. Denn musst du tosehn, dat du de rechte Foot dör dat rechte Büxengatt schuven kannst.

Wenn de Vörsied van de Unnerbüx denn na achtern kickt, hest du en Fehler maakt! Denn helpt dat nix, denn musst du noch maal van vöörn anfangen. Un dat hele Gedoo up bloot Maars

an Beddskant.

Wenn du bi dat eerste Maal mit dat linke Been anfangen büst, sullst du ok bi dat twede Maal links anfangen, anners kunn di datsülvige mallören as vördeem, blot annersrum. Mit en bietje Glück hangt di de Unnerbüx over beide Foten. Man de Büx sall ja hoog.

Mien Raad: Legg di an Beddskant na achtern up de Rügg mit

beid Benen in de Höcht. Nu wat ruckeln mit de Benen, dat de Büx so na un na bit na de Knejen fallt.

Nu kannst du in Stahn de Unnerbüx na boven trecken.

Kiek, un darmit hest du de nahste Stapp na Raseren, Tannenbösseln un Wasken achter di.

Wenn du denn ok noch Hemd un Bovenbüx anhest, kann de Dag beginnen. Daarna Koppke Tee un Stutje of Swartbrood mit Kees - un di kann nüms un nix mehr wat anhebben.

Van nu of an höörst du to de Winnners an disse Dag.

Hans-Hermann Briese

(Na en persönelk Bericht van Alexandra von Altrock)



Hans-Hermann
Briese